

三
國
志
注
補

三國志注補卷七

仁和趙一清謚

魏志列傳第七

呂布字奉先五原郡九原人也

後漢書郡國志五原郡秦九原郡武帝更名一清案方輿紀要卷四十九原城在山西忻州西漢置京陵縣屬太原郡師古曰卽九京也漢末改置九原縣而陝西榆林衛西有九原廢縣漢五原郡治後漢末廢蓋接忻州之西境矣又隋書經籍志有呂布本事一卷毛范謚而裴注不引之

允曰君自姓呂本非骨肉今憂死不暇何謂父子後漢書布傳允曰擲戟之時豈有父子情也

將數百騎出武關

布傳布以卓頭繫馬鞍走出武關

君以千里之眾

布傳作十萬之眾

布遣備屯小沛布自稱徐州刺史

布傳以備爲豫州刺史自號徐州牧

注當駭罪復置

罪字一本作驛是也

注丹楊兵有千人屯西白城門內

白門下邳之城門卽布受擒於曹公處也城字當在西上誤在下

遣鈴下請靈等

鈴乃鈴之譌

術怒與韓暹楊奉等連勢遣大將張勳攻布

布傳術遣大將張勳橋梁等與韓暹楊奉連勢步騎數萬七
道攻布布時兵有三千馬四百匹懼其不敵

注霸畏布引還鈔暴

何云引還二字衍

注果登城拒守布不能收

收一本作拔是也

太祖自征布至其城門

寰宇記卷十五呂布城在徐州彭城縣東南五十里

注我自首當明公

當字宜在自首上

布遣人求救於術

上術字當作袁布傳亦云潛遣人求救於袁術

布與其麾下登白門樓

水經泗水注下邳南門謂之白門布傳注引北征記曰下邳城有三重大城周四里呂布所守也魏武擒布於白門白門大城之門一清案前注引英雄記曰白門是下邳西城門又寰宇記卷十七謂大城周十二里半中城周四里所說不同注鎧甲關具皆精練齊整

關當作關

注布從郝萌反後更疏順以魏續有內外之親

何云然則布妻乃魏氏也

陳登者字元龍

世說言語注引謝承書曰陳登下邳淮浦人學通古今處身循禮非法不行性兼文武有雄姿異略

後許汜與劉備並在荊州牧劉表坐

世說注引襄陽耆舊傳許汜是楊盧同里人少師盧爲魏武從事中郎在劉表坐論陳元龍者其人也

汜曰陳元龍湖海之士豪氣不除

何云於時謂驕爲豪魏略畢軌在并州名爲驕豪是也

注年二十五舉孝廉除東陽長

後漢書郡國志廣陵郡東陽故屬臨淮

注太祖以登爲廣陵太守

方輿紀要卷二十二陳登爲廣陵太守治射陽三國時廢射陽城在鹽城縣西九十里

注未及期年功化以就百姓異而愛之

寰宇記卷百二十三愛敬陂在江都縣西十五里陳登初開此陂百姓愛而敬之因以爲名亦號陳登塘方輿紀要卷二十三陳公塘在揚州府西周迴九十餘里散爲三十六汊爲利甚溥唐食貨志揚州疏太子港陳登塘凡三十四陂以益漕河又紀要卷二十二高家堰在淮安府西南四十里陳登築堤防淮此其故址也

注孫策遣軍攻登於匡琦城

匡琦似是人姓名如高遷屯白超壘之類陳矯傳作匡奇案建安十三年孫權圍合肥使張昭攻九江之當塗而張昭傳注引吳書云別討匡琦則匡琦城卽當塗城也

注遷登爲東城太守

前漢書地理志九江郡東城縣後漢省故續志無之未聞立郡也此城疑郡字之誤登內廣陵還東郡旣去而淮南遂虛曹公故追恨不用其計也若仍在九江則何歎恨之有

臧洪字子源廣陵射陽人也

方輿紀要卷二十二射陽漢縣三國時廢晉復置

父昱歷匈奴中郎將中山太原太守

後漢中山是王國當云相中山國都治盧奴注云爲盧奴令是也恐傳有誤

洪體貌魁梧有異於人舉孝廉爲郎

後漢書洪傳洪年十五以父功拜童子郎知名太學舉孝廉琅邪趙昱爲莒長東萊劉繇下邑長東海王朗菑邱長洪卽邱長

後漢書郡國志梁國下邑又瑯琊莒本國故屬陽城卽邱侯國故屬東海彭城國菑邱

紹歎其能

洪傳歎作憚

紹令洪邑人陳琳書與洪喻以禍福責以恩義

洪傳注引獻帝春秋曰紹使陳琳爲書八條責以恩義告喻使降也

其爲愴恨

恨字何氏校作恨

輕重殊塗親疏異書故便收淚告絕

洪傳載此書云豈悟此州被侵郡將遘厄請師見拒辭行被拘使洪故君遂至淪滅區區微節無所獲申豈得復全交友之道重虧忠孝之名乎所以忍悲揮戈收淚告絕詳洪語意是時紹并拘制之使不得赴救故發憤絕紹也

昔張景明親登壇啗血

張景明名導水經濁漳水注張導字景明建和三年爲鉅鹿

太守漳津汎濫土不稼穡導披案地圖與丞彭參掾馬道嵩等原其順逆揆其表裏修防排通以正水路功績有成民用嘉賴題云漳河神壇碑卽是人也建和當作建安

注然馥之讓位

據洪傳注然下落則字

注徐眾三國評曰

隋書經籍志三國志評三卷宋徐爰撰眾字誤也

宿松羅忠濟初校

黟縣黃士陵覆校

陽湖吳蟬寅再覆校

三國志注補卷七

三國志注補卷八

仁和趙一清撰

魏志列傳第八

爲郡門下書佐

後漢書瓚傳家世二千石瓚以母賤遂爲郡小吏

有姿儀大音聲故太守器之

瓚傳注引魏志是侯太守

瓚將所領追討純等有功遷騎都尉

後漢書靈帝紀中平四年六月潁陽人張純與同郡張舉舉兵叛攻殺右北平太守劉政遼東太守陽終護烏桓校尉公綦稠等舉自稱天子寇幽冀二州五年九月遣中郎將孟益

率騎都尉公孫瓚討純等十一月瓚與純戰於石門大破之
六年三月幽州牧劉虞購斬純一清案陽終水經注作陽紘
孟益水經注作孟溢

遷中郎將封都亭侯進屯屬國

瓚傳詔拜瓚降虜校尉封都亭侯復兼領屬國長史職統戎
馬連接邊寇每間有警瓚輒厲色憤怒如赴警敵望塵奔逐
或繼之以夜戰虜識瓚聲憚其勇莫敢抗犯瓚常與善射之
士數十人皆乘白馬以爲左右異自號白馬義從烏桓更相
告語避白馬長史乃畫作瓚形馳騎射之中者咸稱萬歲御
覽卷八百七十引英雄記曰瓚與破虜校尉鄒靖俱追胡靖
爲所圍瓚回師奔救胡卽破散解靖之圍乘勝窮追日入之

後把炬逐北

注吳書曰虞東海恭王之後也

後漢書虞傳注引謝承書曰虞父舒丹陽太守虞通五經會董卓至洛陽遷虞大司馬

後漢書百官志太尉公一人世祖卽位爲大司馬建武二十七年改爲太尉劉昭曰劉虞爲大司馬而與太尉並置焉紹等復勸虞領尙書事承制封拜虞又不聽

虞傳遂收斬使人

注是時有四星會於箕尾馥稱讖云神人將在燕分又言濟陰男子王定得玉印文曰虞爲天子又見兩日出於代郡謂虞當代立

何云四星會於箕尾昭烈起涿郡之祥虞爲天子魏虞後也
一清案當時有以魏爲舜後者故義門云然見蔣濟傳

由是虞瓚益有隙

虞傳云初詔令公孫瓚討烏桓受虞節度瓚但務會徒衆以
自彊大而縱任部曲頗侵擾百姓虞爲政仁愛念利民物由
是與瓚不相平瓚傳云瓚志掃滅烏桓而劉虞欲以恩信招
降由是與虞相忤

是時術與孫堅屯陽城拒卓紹術周昂奪其處

瓚袁紹罪狀亦云周昂而瓚傳作周昕案吳志孫靜傳昕爲
孫策所殺堅傳注引吳錄云袁紹遣會稽周暘爲豫州刺史
來襲取州暘字仁明周昕之弟也又引會稽典錄曰暘與堅

爭豫州屢戰失利會次兄九江太守昂爲袁術所攻暉往助之軍敗還鄉里爲許貢所害則昂自爲袁術所攻與堅無與宜以周暉爲得其實蓋周昂兄弟三人皆與孫氏爲讐敵故各書所記不同

瓚怒曰余弟死禍起於紹遂出軍屯磐河

磐河卽般河水經河水注所謂東入般縣爲般河也袁紹傳注曰爾雅有九河鉤般其一也故河在今德州昌平縣界入滄州樂陵縣今名枯槃河

範遂以渤海兵助瓚破青徐黃巾兵益盛進軍界橋

獻帝紀注今冀州宗城縣東有古界城近枯漳水則界橋在此也水經淇水注清河又東北逕界城亭東水上有大梁謂

之界城橋瓚傳初平二年青徐黃巾三十萬眾入渤海界欲與黑山合瓚率步騎二萬人逆擊於東光南大破之斬首三萬餘級賊棄其車重數萬兩奔走渡河瓚因其半濟薄之賊復大破死者數萬流血丹水收得生口七萬餘人車甲財物不可勝算威名大震

注至使太傅門戶太僕母子一旦而斃

瓚傳作纍然同斃而字誤也

注紹令崔巨業候視星日

瓚傳紹令星工伺望祥妖注云星工善星者據瓚傳巨業是紹將

注輒與諸將州郡其討紹等

瓚傳其作共

以嚴綱爲冀州田楷爲青州單經爲兗州置諸郡縣紹軍廣川
令將麴義先登與瓚戰生擒綱瓚軍敗走渤海與範俱還
瓚傳瓚自署其將帥爲青冀兗三州刺史又悉置郡縣守令
與紹大戰於界橋瓚軍敗還薊紹遣將崔巨業將兵數萬攻
圍故安不下退軍南還瓚將步騎三萬追擊於巨馬水大破
其眾死者七八千人乘勝而南攻下郡縣遂至平原乃遣其
青州刺史田楷據有齊地紹復遣兵數萬與楷連戰二年糧
食並盡士卒疲困互掠百姓野無青草紹乃遣其子譚爲青
州刺史楷與戰敗退還

於大城東南築小城與虞相近

虞傳瓚築京於薊城以備虞其後又築京於易曰易京也

虞懼瓚爲變遂舉兵襲瓚

虞傳虞率諸屯兵攻瓚將行從事代郡程緒免胄而前曰公孫瓚雖有過惡而罪名未正明公不先告曉使得改行而兵起蕭牆非國之利加勝敗難保不如駐兵以武臨之瓚必悔禍謝罪所謂不戰而服人者也虞以緒臨事沮議斬之以徇戎軍士曰無傷餘人殺一伯珪而已時州從事公孫紀者瓚以同姓厚待遇之紀知虞謀而夜告瓚

瓚誣虞欲稱尊號脅誅斬虞

虞傳傳首京師故吏尾敦於路劫虞首歸葬之

注虞眾大潰奔居庸城瓚攻反家屬以還

攻下有脫文虞傳云攻之三日城陷遂執虞并妻子還薊
注時盛暑竟日不雨

何云暑下北宋本有熱字

袁紹又遣麴義及虞子和將兵與輔合擊瓚

方輿紀要卷十三麴義壘在河間縣東城鎮北十四里

瓚軍數敗乃走還易京固守

水經易水注瓚自薊徙臨易水謂之易京城在易城西四五
里趙建武四年石虎以京障至固令二萬人廢壞之今者城
壁夷平其樓基尙存猶高一匹餘基上有井世名易京樓卽
瓚所保也

瓚曰昔謂天下事可指麾而定

瓚傳瓚曰昔我驅畔胡於塞表埽黃巾於孟津當此之時謂天下指麾可定注引九州春秋曰瓚曰始天下兵起我謂唾手而決

注及龍河之師

龍河卽龍湊也見後漢書袁紹傳

注後比得足下書辭意婉約有改往修來之言

何云此記趙岐和解時言

復欲自將突騎直出徬西南山

南字衍西山謂太行山張燕傳所云常山趙郡中山上黨河

北諸山谷皆相通是也

注紹侯者得之使陳琳更其書曰

何云更其書者所以誦瓚在昔衰周二十四字後漢書卽作瓚與續書發端者近之非琳所更也

瓚自知必敗盡殺其妻子乃自殺

瓚傳悉縱其姊妹妻子然後舉火自焚續爲屠各所殺田楷與袁紹戰死

拜左渡遼將軍封亭侯

瓚傳封都亭侯

從征三郡烏丸以功封關內侯

瓚傳云拜護烏桓校尉

少好學爲諸生仕州郡舉茂才除盧令

後漢書地理志城陽國有慮縣卽盧也後漢郡國志注謂建

武中省城陽國以其縣屬瑯邪獨無慮縣

注常以舞屬謙謙不爲起固彊之及舞又不轉

御覽卷五百七十四引作乃舞舞不轉此有譌脫宋書樂志
前世樂飲酒酣必起自舞魏晉以來九重以舞相屬所屬者
代起舞猶若飲酒以代柸相屬也

注欲以賦之

何云賦下疑有劾字

遷安東將軍徐州牧封溧陽侯

後漢書郡國志丹陽郡溧陽

注顧故鄉而哀難

難一本作歎

單于執楊至黎陽

何云北宋本執作與

太祖之圍布楊欲救之不能乃出兵東市

後漢書郡國志河內郡野王有射犬聚卽下文所云犬城則東市亦當在其處

度父延避吏居元菟任度爲郡吏

方輿紀要卷三十八元菟郡漢滅朝鮮開本治沃沮城爲夷貊所侵徙治高句麗西北公孫氏據遼東置元菟郡於遼東東北二百里蓋因舊名非復故治也

注乃娶妻生子允而遣妻

晉書李允傳允字宣伯

文帝踐阼遣使卽拜恭爲車騎將軍假節封平郭侯

後漢書郡國志遼東郡平郭

注值武皇帝休明之會合策明之計

何云策明當作策名

注奔馳赴難軍旅行成

何云當作成行

注若魏伏淵不克而我軍遠赴

伏一作伐

淵遣將軍畢衍楊祚等步騎數萬屯遼隧

前漢書地理志遼東郡遼隊方輿紀要卷三十七遼隊城在海州衛西六十里隊讀隨後漢初廢公孫度復置

諸軍進至首山

方輿紀要首山在遼東都司西南十五里一名手山以山頂石上有文如指掌故名

遂進軍造城下爲圍塹

御覽卷三百三十七引司馬彪戰略曰太尉司馬軍到襄平圍之北面東面有圍不合連車置水中積石鎮其上以鹿角塞之去城百步穿重塹豎連柵安諸營立樓櫓其近水沙地不得作圍塹而車輪以大七椽穿中又豎輪障其前

斬淵父子城破斬相國以下首級以千數傳淵首洛陽

晉書宣帝紀公孫文懿反帝師次遼水文懿阻遼隊堅守南北六七十里以距帝帝盛兵多張旗幟出其南賊盡銳赴之

乃泛舟潛濟以出其北與賊營相逼沈舟焚梁傍遶水作長
圍棄賊而向襄平諸將言曰不攻賊而作圍非所以示眾也
帝曰賊堅營高屋欲以老吾兵也攻之正入其計此王邑所
以恥過昆陽也古人曰敵雖高品不得不與我戰攻其所必
救也賊大衆在此則巢窟虛矣我直指襄平則人懷內懼懼
而求戰破之必矣遂整陣而過賊見兵出其後果遽之帝謂
諸將曰所以不攻其營正欲致此不可失也乃縱兵逆擊大
破之三戰皆捷賊保襄平進軍圍之文懿大懼使其所署相
國王建御史大夫柳甫乞降請解圍面縛不許執建等斬之
檄告文懿曰昔楚鄭列國鄭伯猶肉袒牽羊而迎之孤爲王
人位則上公而建等欲孤解圍退舍豈楚鄭之謂邪二人老

老必傳言失旨已相爲斬之若意有未已可更遣年少有明
決者來文懿復遣侍中衛演乞剋日送任帝謂演曰軍事大
要有五能戰當戰不能戰當守不能守當走餘二事惟有降
與死耳汝不冒面縛此爲決就死也不須送任文懿攻南園
突出帝縱兵擊敗之斬於梁水之上僞公卿以下皆伏誅初
文懿篡其叔父恭位而囚之及將反將軍綸直賈範等苦諫
文懿皆殺之帝乃釋恭之囚封直等之墓顯其遺嗣遂班師
注遼東帶方樂浪元菟悉平

方輿紀要卷三十八帶方城漢縣公孫度置帶方郡

博陵張牛角亦起眾

張牛角卽後漢書袁紹傳之青牛角也水經瀛水注瀛水東

北逕蠡吾縣故城南地理風俗記曰縣故饒陽之下鄉也自河間分屬博陵又逕博陵縣故城南卽古陸城地里風俗記曰博陵縣史記蠡吾故縣矣漢質帝本初元年繼孝沖爲帝追尊父翼陵曰博陵因以爲縣又置郡焉漢末罷還安平一清案後漢書郡國志無博陵中山國蠡吾侯國故屬涿前漢書地理志中山國陸城後書又無之蓋合二縣爲一也又晉書地理志桓帝增置高陽博陵二郡高陽蓋分河間國置治博陵縣今保定府博野縣南陸成廢縣是博陵蓋分安平國置治安平縣今真定府晉州安平縣是博野縣漢蠡吾縣地也又晉志高陽博陵二國並列而高陽之名不見魏時中間或有廢省復置此博陵是郡非縣也

注九州春秋曰張角之反也黑山白波黃龍左校牛角五鹿祗根苦蝟劉石平漢大洪司隸緣城羅市雷公浮雲飛燕白爵楊鳳于毒等各起兵

後漢書朱雋袁紹傳作青牛角於氏根苦晒大計掾哉雋傳注引九州春秋大計作大洪掾哉作掾戎又有曰繞畦固二部平漢乃陶升也故爲內黃小史見紹傳及注

注張璠漢記云又有左校郭大賢左髡丈八三部也

郭大賢疑是左校之帥故下云三部

燕遣將杜長等助瓚與紹戰爲紹所敗人眾稍散

紹傳與黑山賊張燕及四營屠各雁門烏桓戰於常山精兵數萬騎數千匹連戰十餘日燕兵死傷雖多紹軍亦疲遂各

退

張繡武威祖厲人

前漢書地理志安定郡祖厲後漢書郡國志屬武威應劭曰
祖音冑師古曰厲音賴祖字从衣不从示

注吳書曰繡降淩統用賈詡計乞徙軍就高道道由太祖屯中
賈傳是欲往就劉表耳

張魯字公祺

後漢書劉焉傳作公旗

祖父陵客蜀學道鵠鳴山中

劉焉傳注山在益州晉原縣南

造作道書以惑百姓從受道者出五斗米故世號米賊陵死

御覽卷六百六十二引真誥曰陵字輔漢本大儒晚學長生之道九鼎丹經間蜀中多名山乃入鳴鶴山著道書二十餘篇仙去李膺益州記曰張陵避病瘡於邱社中得咒鬼術書遂解使鬼法入鳴鶴山自稱天師漢熹平末爲蟒蛇所噉子衡奔走尋尸無所乃假設權方以表靈化生糜鶴迹置石崖頂光和二年遣信告曰正月七日天師昇元都衡爲係師衡子魯爲嗣師方輿紀要卷六十八間中縣文成山有張道陵元都臺

益州牧劉焉以魯爲督義司馬與別部司馬張脩將兵擊漢中太守蘇固

水經沔水注瀘水南逕張魯城東初平中劉焉以魯爲督義

司馬住漢中斷絕閣道用遠城治因卽嶠嶺周迴五里東臨
濬谷杳然百尋西北二面連峯接崖莫究其極從南爲盤道
登涉二里有餘澁水又南逕張魯治東水西山上有張天師
堂於今民事之庾仲雍謂山爲白馬寨堂爲張魯治東對白
馬城一名陽平關後漢書靈帝紀中平元年七月巴郡妖巫
張脩反寇郡縣注引劉艾紀曰時巴郡巫人張脩療病愈者
雇以五斗米號爲五斗米師

焉死子璋代立以魯不順盡殺魯母家室

劉焉傳魯母有姿色兼挾鬼道往來焉家

漢末力不能征遂就寵魯爲鎮民中郎將領漢寧太守

劉焉傳及續志注引袁山松書曰建安二十年置漢寧郡漢

三國志注補卷九

仁和趙一清撰

魏志列傳第九

夏侯惇

案承祚以夏侯與諸曹互列一卷正隱寓操爲夏侯氏子至操以女妻惇蓋欲掩其迹所謂奸也而何氏轉據此方辨操非攜養不亦慎乎

注自安順已降政教陵遲劫質不避王公而有司莫能遵奉國憲者浩始復斬之故魏武嘉焉

何云後漢書橋元傳元少子爲人所劫執元促令兵攻之元子亦死此靈帝光和元年事

復領陳畱濟陰太守加建武將軍

宋百官志建武將軍魏置

時大旱蝗蟲起惇乃斷太壽水作陂

太壽不見於兩漢志大約地在鹽陵襄邑之間水經汭水注汭水又東逕夏侯長塢續述征記曰夏侯塢至周塢各相距五里疑卽惇所治也

太祖平河北爲大將軍後拒

將字衍魏武時爲司空不爲大將軍惇親貴殊倫又不當爲他將後距也

二十四年太祖軍擊破呂布軍於摩陂

魏武擒布在建安三年此爲誤文是年關公圍曹仁於襄陽

魏武軍於摩陂以爲之援亦無攻戰事

諸將莫得比也拜前將軍

宋百官志左右前後將軍光武建武七年省魏以來復置一清案後漢書郡國志云前後左右雜號將軍眾多皆主征伐事訖皆罷則是未嘗省也故袁術爲後將軍公孫瓚爲前將軍樊稠爲右將軍呂布爲左將軍皆在魏國未建之先則東漢末已皆具其官矣

注文帝卽王位拜惇大將軍

何云北宋本惇下有爲字

注浩至中護軍渙至中領軍

宋百官志建安十二年改護軍爲中護軍領軍爲中領軍置

長史司馬資重者爲領軍護軍將軍資輕者爲中領軍中護軍後漢書郡國志注魏略曰曹公置護軍將軍比二千石旋軍止罷

注時浩舅杜陽爲河陰令

兩漢志皆無河陰顧祖禹曰平陰魏文帝改河陰杜陽爲令時不應有河陰之名蓋史家追改之

擊破南山賊劉雄

劉雄鳴見張魯傳注此脫鳴字

韓遂在顯親

後漢書郡國志漢陽郡顯親方輿紀要卷五十九顯親城在陝西秦州東南十里本成紀縣地後漢建武中分置

淵以爲遂兵精興國城固攻不可卒拔不如擊長離諸羌

方輿紀要卷五十九云長離水在秦州東水經注瓦亭水南逕成紀縣東歷長離川謂之長離水漢末燒當羌據之

餘眾降轉擊高平屠各

後漢書郡國志安定郡高平

淵別遣張郃等平河關渡河入小湟中河西諸羌盡降

後漢書郡國志隴西郡河關故屬金城水經河水注應劭曰

禹貢析支屬雍州在河關之西東去河關千餘里羌人所居

謂之河曲羌也又湟水東流逕隍中城北故小月氏之地十

三州志曰平西張掖之間大月氏之別小月氏之國後漢書

曰湟中月氏胡者其王爲匈奴所殺餘種分散西踰蔥嶺其

弱者南入山從羌居止故受小月氏之名也

留淵守漢中卽拜淵征西將軍

宋百官志魚豢曰四征魏武帝置秩二千黃初中位次三公淵分所將兵半助郤爲備所襲淵遂戰死

魏武帝集軍策令曰夏侯淵今月賊燒卻鹿角鹿角去本營十五里淵將四百兵行鹿角因使士補之賊山上望見從谷中卒出淵使兵與關賊遂繞出其後兵退而淵未至甚可傷淵本非能用兵也軍中呼爲白地將軍爲督將尙不當親戰況補鹿角乎

注魏略曰霸字仲權

隋經籍志夏侯霸集二卷

注子午之役霸召爲前鋒進至興世園

興勢地名在定軍山世字誤也是役在魏太和四年詳曹真及蜀後主二傳

注莊子湛字孝若以才博文章至南陽相散騎常侍

晉書夏侯湛傳湛幼有盛才文章宏富善構新詞而美容觀與潘岳友善每行止同輿接茵京都謂之連璧

注莊晉景陽皇后姊夫也

陳少章云陽當作羊此晉獻穆皇后也

威弟惠

隋經籍志夏侯惠集二卷錄一卷

注賓客百餘人人一奏刺悉書其鄉邑名氏世所謂爵里刺也

釋名爵里刺書其官爵及郡縣鄉里也御覽卷六百六引魏名臣奏議黃門侍郎荀攸奏曰今吏初除刺有二一刺通爵二刺條疏行狀

太祖征呂布仁別攻句陽

後漢書郡國志濟陰郡句陽

仁數有功拜廣陽太守

後漢書郡國志廣陽郡注高祖置爲燕國昭帝更名爲郡世

祖省并上谷永平八年復

紹遣劉備徇瀝疆諸縣

後漢書郡國志汝南郡瀝疆

紹遣別將韓荀鈔斷西道

韓萇見荀攸傳荀字誤

仁擊荀於雞洛山

水經滄水注水出鄆城西北雞洛塢下方輿紀要卷四十七
鄆城在河南禹州密縣東北五十里溱水亦曰鄆水東南流
合洧水

三軍服其勇太祖益壯之

姜云此俱有飾詞仁豈公瑾之敵

仁人馬數千人守城城不沒者數板

水經沔水注平魯城西南有曹仁記水碑

仁與徐晃攻破邵遂入襄陽使將軍高遷等徙漢南附化民於
漢北

此亦飾詞也晉書宣帝紀孫權帥兵西過朝議以樊襄陽無穀不可以禦寇時曹仁鎮襄陽請召仁還宛帝曰孫權新破關羽此其欲自結之時必不敢爲患襄陽水陸之衝禦寇要害不可棄也言竟不從仁遂焚棄二城權果不爲寇魏文悔之

又詔仁移屯臨潁

後漢書郡國志潁川郡臨潁

遷大司馬復督諸軍據烏江

方輿紀要卷二十六青城廢縣在安慶府太湖縣東四十里志云魏將曹仁所築唐武德中置縣於此尋廢烏江廢縣在和州東北四十里秦烏江亭也漢爲東城縣地史記項羽本

紀注瓚曰烏江在牛渚菰和州對岸爲太平府當塗縣之采石山亦謂之牛渚圻烏江卽和州江矣有烏江浦

注太祖曰純之比何可復得吾獨不中督邪遂不選

姜云純真休皆將虎豹騎以宿衛精兵非親子弟不可也曹純死而自將之以無子弟可任者非無曹純其人也

正元中進封平樂鄉侯

三少帝紀注引魏書永寧宮奏有武衛將軍安壽亭侯臣演卽純之子蓋由亭侯進封鄉侯傳云進封可證

遂據東阿轉擊濟陰山陽中牟陽武京密十餘縣皆拔之

此錯舉郡縣以成文濟陰則定陶也山陽則昌邑也二者皆郡也中牟下四縣名若河內之山陽縣故城在懷慶府修武

縣西北六十里去濟陰甚遠不得連及然下云十餘縣則遺卻二郡此臨文之語病耳

以前後功拜鷹揚校尉遷揚武中郎將

宋百官志鷹揚將軍建安中魏武以曹洪居之二書不同未知孰誤

破表別將於舞陽陰葉堵陽博望有功

前漢書地理志舞陽屬潁川下四縣俱屬南陽

後徙封都陽侯

前漢書地理志東海郡有都陽縣後漢書郡國志無益東京省并應劭曰春秋齊人遷陽是此注與城陽國之陽都正同又郡國志瑯琊國陽都故屬城陽益陽都都陽各以其地近

爲名而一存一廢洪封本是縣侯蓋取舊縣以爲封邑耳

始洪家富而性吝嗇

寰宇記卷五十五相州安陽縣有曹洪宅隋圖經云宅南有景穆寺西有石竇橋

文帝少時假求不稱常恨之遂以舍客犯法下獄當死

何云案此舉雖文帝不宐而洪舍客亦屢犯法與劉勳並稱亦由素不檢制其下也事見賈逵傳注中

天下亂宗族各散去鄉里

何云北宋本去作居

拜休中領軍文帝卽王位爲領軍將軍

晉書職官志中領軍魏官也建安四年魏武丞相府自置及

拔漢中以曹休爲中領軍文帝踐阼始置領軍將軍以曹休爲之主五校中壘武衛等三營一清案建安四年魏武爲司空至十三年始爲丞相四年上疑落十字

孫權遣將屯歷陽

後漢書郡國志九江郡歷陽

擊權大將呂範等於洞浦破之拜揚州牧

據此曹魏刺史尊者亦爲牧

遣司馬宣王從漢水下督休諸軍向尋陽

陳少章云督休二字當乙宣王與休並爲上將分道而進宣王方從西道牽吳上游則東軍之向尋陽者不得兼督也前漢書地理志廬江郡尋陽方輿紀要卷七十六尋水城在湖

廣新州東尋陽紀謂之蘭池城古尋陽也又卷八十五尋陽城在江西九江府西十五里是六朝之尋陽也後漢時尋陽爲豫章廬江二郡界三國時屬吳蕪春郡爲督護要津廬山記尋陽縣在大江北尋水之陽晉咸和以後始移於江南杜佑曰溫嶠所移也王氏曰惠帝永興初分廬江武昌立尋陽郡治豫章之柴桑而尋陽之名亂成帝咸和中移江州治尋陽而江南之尋陽著江北之尋陽益晦矣

休深入戰不利退還宿石亭

方輿紀要卷二十六石亭在安慶府東北

注世語曰肇字長思

御覽引曹肇傳明帝愛肇與帝戲賭衣服有所獲輒入御帳

服之遽出親狎如此

注據與齊人左思俱爲記室督從中郎出爲襄陽太守征南司馬值天下亂據討賊向吳戰敗死

晉書高密孝王略傳京兆流人王逌與叟人郝洛聚眾數千屯於寇軍略遣參軍崔曠率將軍皮初張洛等討逌爲逌所誦戰敗略更遣左司馬曹據統曠等進逼逌將大戰曠在後密自退走據軍無繼戰敗死之又文苑傳曹毗字輔佐高祖休魏大司馬父識右軍將軍毗少好文籍善屬詞賦累遷至光祿勳

太祖壯其鷁勇使將虎豹騎討靈邱賊拔之

齊趙皆有靈邱觀真以功封靈壽侯則此是趙靈邱也後漢

書郡國志常山有靈壽縣而代郡之靈邱廢

以眞爲征蜀護軍

宋百官志魏晉有雜號護軍如將軍

眞遣費羅討破之

明帝紀耀作曜晉書紀亦作曜

轉拜中軍大將軍加給事中

晉書職官志給事中秦官也漢東京省魏世復置

安定民楊條等略吏民

前後漢書地理志安定郡領安定縣後漢省今爲涇州治

眞以蜀連出侵邊境宜遂伐之數道並入可大克也

何云內審已外量敵於時豈能必取而數道興師子丹此舉

幾於敗國喪名昭伯嗣事於蜀遂爲結怨天下之始亦微倖之餘殃也

會大霖雨三十餘日或棧道斷絕詔眞還軍

晉書宣帝紀與曹眞伐蜀帝自西城斫山開道水陸並攻進
泝河而上至於朐胝拔其新豐縣軍次丹口遇兩班師一清
案後漢書郡國志朐胝縣屬巴郡而無新豐之名新豐當是
漢豐水經江水注彭水東南流逕漢豐縣東又逕朐胝縣西
方輿紀要卷六十九夔州府開縣漢朐胝縣地後漢建安末
析置漢豐縣三國漢屬巴東郡

明帝在東宮甚親愛之

世說爽少與明帝同筆硯

注先帝以臣肺腑遺緒獎飭拔擢

飭一作飾

注夫天下之達道者三

道一作尊

爽弟羲爲中領軍

晉書宣帝紀正始六年秋八月曹爽毀中壘中堅營以兵屬其弟中領軍羲帝以先帝舊制禁之不可刑法志曰正始之間天下無事於是征西將軍夏侯玄河南尹李勝中領軍曹羲尚書丁謐追議肉刑卒不能決御覽卷二百六十五晉宣帝欲除九品州置大中正曹羲集九品議曰伏見明論欲除九品而置中正欲檢虛實一州闊遠略不相識訪不得知會

復轉訪本郡先達者耳此爲問州中正而實沒於郡人又晉書王接傳接父蔚世修儒史之學魏中領軍曹羲作至公論蔚善之隋經籍志曹羲集五卷錄一卷

注世語曰偉字世英馮翊人

隋書經籍志桑邱先生書二卷晉征南軍師楊偉撰又有時務論十二卷案田邱儉詩云楊偉無根基想其人必出於寒素

注今興平路勢至險

此語疑有錯誤是時魏軍入漢蜀已先據興勢園之後主王平兩傳極爲分明於文當是今興勢山路至險顧景范亦云爾

注費禕進兵據三嶺以截爽

方輿紀要卷三十六三嶺沉嶺見盤屋縣衙嶺見郿縣分水嶺見武功縣一云駱谷有三嶺關

宣王遂稱疾避爽

晉書山濤傳辟部河南從事與石鑒共宿濤夜起蹴鑒曰今爲何等時而眠耶知太傅臥何意鑒曰宰相三不朝與尺一令歸第卿何慮也濤曰咄石生無事馬蹏閒耶投傳而去未二年果有曹爽之事

注初宣王以爽魏之肺腑每推先之

此條不出書名疑有脫文

使先帝健仔教習爲技

晉書梁王彤傳時諸王自選官屬彤以汝陰上計吏張蕃爲中大夫蕃素無行本名雄妻劉氏解音樂爲曹爽教伎蕃又往來何晏所而恣爲姦淫晏誅徙河間乃變名自結於彤爲有司所奏詔削一縣

注宣王乃復陽爲昏謬曰君方到并州努力自愛錯亂其辭狀如荒語勝復曰當忝荊州非并州也

何云勝言當爲本州懿若不知荊州何緣錯誤曰并州卽一字可悟其詐蓋意氣驕溢不復審察遂冥然無覺耳於此得其匿情相伺之機固不難爲備也

注盛德烈壯

當依宣帝紀作壯烈

注更向爽等垂淚云太傅患不可復濟令人愴然

晉書后妃傳宣穆張皇后智識過人宣帝初辭魏武之命託以風痺嘗曝書遇暴雨不覺自起收之家惟有一婢見之后恐事泄致禍遂手殺之以滅口而親自執爨帝由是重之一清案司馬憤以此術愚人何前後如出一轍也

宣王部勒兵馬先據武庫遂出屯洛水浮橋

晉書景帝紀宣帝之將誅曹爽深謀祕策獨與帝潛畫初帝陰養死士三千散在人間至是一朝而集眾莫知所出也方輿紀要卷四十八橋在洛陽故城南五里後漢時建魏晉因之隋曰天津橋何云昭伯兄弟專政九年乃反禍敗宣王舉事固非聊爾一擲也

臣言二祖亦屬臣以後事爲念

何云爲念二字衍

殿下宿衛歷世舊人皆復斥出

宣紀出作黜

此乃陛下之大鑒臣受命之時也

宣紀受作授

太尉臣濟

晉書王渾傳公孫宏曰昔宣帝廢曹爽引太尉蔣濟參乘以

增威重

注爽妻劉氏出至廳事謂帳下守督曰

宣紀督是嚴世

大司農沛國桓範間兵起不應太后召矯詔開平昌門

水經穀水注平昌門故平門也方輿紀要卷四十八雒陽南面四門正南一門曰平門亦曰平城門魏晉以後曰平昌門侍中許允尙書陳泰說爽使早自歸罪

何云是役舊德如蔣濟人望如陳許皆爲仲達所欺

注爽信之罷兵

宋書五行志明帝太和中京師歌兒鈴曹子其唱曰其奈汝曹何其後曹爽見誅曹氏遂廢

遂免爽兄弟以侯還第

水經穀水注渠水西有永寧寺熙平中始搆也其地是曹爽故宅經始之日於寺院西南偶得爽窟室下入地可丈許地

壁悉累方石砌之石作細密都無所毀其石悉人法用自非曹爽庸匠亦復難制此桓氏有言曹子丹生此豚犢信矣又晉書楊駿傳居曹爽故府在武庫南然則爽居可稱凶宅初張當私以所擇才人張何等與爽

宣紀黃門張當私出掖庭才人石英等十一人與曹爽爲伎人

於是收爽義訓晏颺謚軌勝範當等皆伏誅夷三族

宣帝紀誅曹爽之際支黨皆夷及三族男女無少長姑姊妹女子之適人者皆殺之

注故京師爲之語曰以官易富鄧元茂

何云謂富當作婦

注其在臺閣有所彈駁

有所上一本有數字

注此安危之要唯聖思察之

思一本作恩

注太祖以其勸魯內附賜爵關內侯署散官騎從

晉職官志魏黃初初置散騎合之於中同掌規諫不典事貂璫插右騎而散從

注明帝禁浮華而人白勝堂有四窗八達

諸葛誕傳注窗作聰

注由是司馬宣王不悅於勝累遷滎陽太守河南尹

水經濟水注魏正始三年歲在甲子被癸丑詔書割河南郡

縣自鞏闢以東劫建榮陽郡并戶二萬五千以南鄉筑陽鄉
亭侯李勝字公昭爲郡守故原武典農校尉政有遺惠民爲
立祠於城北五里號曰李君祠廟前有石蹠蹠上有石的石
的銘具存其略曰百族欣戴咸推厥誠今猶祀禱焉

注小材一枚激墮正槌受符吏石虎

槌當从手晉五行志曰此木沴金也

注復爲兗州刺史快快不得意

御覽卷二百五十五引桓氏家傳範爲兗州刺史表謝曰喜
於復見選擢慙於不堪所職悲於戀慕闕庭三者交集不知
所裁

注眾人爲君難爲作下

上爲字當作謂

注範嘗鈔振漢書中諸雜事自以意斟酌之名曰世要論

隋經籍志世要論十二卷魏大司農桓範撰樂有二十卷

注漢晉春秋曰安定皇甫謐

晉書皇甫謐傳謐字士安安定朝那人漢太尉嵩之曾孫自號玄晏先生

注世語曰初爽出司馬魯芝畱在府間有事將營騎斬津門出赴爽爽誅擢爲御史中丞

晉書良吏魯芝傳世有名德爲西州豪族父爲郭汜所害芝襁褓流離年十七乃移居雍耽思墳籍郡舉上計吏州辟別駕魏車騎將軍郭淮爲雍州刺史深敬重之舉孝廉除郎中

會蜀相諸葛亮侵隴右淮復請芝爲別駕事平薦於公府辟
大司馬曹真掾轉臨淄侯文學拜騎都尉參軍事行安南太
守遷尙書郎曹真出督關右又參大司馬軍事真薨宣帝代
焉乃引芝參驃騎軍事轉天水太守遷廣平太守天水夷夏
慕德老幼赴闕獻書乞畱芝魏明帝許焉仍策書嘉歎勉以
黃霸之美加討寇將軍曹爽輔政引爲司馬芝屢有讜言嘉
謀爽弗能納及宣帝起兵誅爽芝率餘眾犯門斬關馳出赴
爽勸爽曰公居伊周之位一旦以罪見黜雖欲牽黃犬復可
得乎若挾天子保許昌仗大威以羽檄徵四方兵孰敢不從
捨此而去欲就東市豈不痛哉爽懷惑不能用遂委身受戮
芝坐爽下獄當死而口不訟直志不苟免宣帝嘉之赦而不

誅俄起爲使持節領護匈奴中郎將鎮威將軍并州刺史水經穀水注津陽門故津門也方輿紀要卷四十八雒陽南面四門其西曰小苑門又西曰津門以洛水自此入城而名魏晉以後曰津陽門

注宥之以爲尙書郎

何云芝綜位下人微不難宥之以示公

注干寶晉紀曰蔣濟以曹真之勳力不宜絕祀故以熙爲後濟又病其言之失信於爽發病卒

宣帝紀嘉平元年正月爽誅濟曰曹真之勳不可以不祀帝不聽而濟卽以是年卒懿以三年八月死其紹封當屬子元秉政之日也

晏何進孫也

世說注引魏略曰晏南陽宛人漢何進孫或曰何苗孫也

母尹氏爲太祖夫人晏長於宮省

御覽卷三百八十五引何晏別傳曰晏小時養魏宮七八歲
便慧心天悟眾無愚智莫不貴異之魏武帝談兵書有所未
解試以問晏晏分散所疑無不冰釋又卷三百九十三引晏
別傳曰晏小時武帝雅奇之欲以爲子每挾將遊觀命與諸
子長幼相次晏微覺於是坐則專席止則獨立或問其故答
曰禮異族不相貫坐世說曰何晏七歲明惠若神魏武奇愛
之因晏在宮內欲以爲子晏乃畫地令方自處其中人問其
故答曰何氏之廬也魏武知之卽遣還

又尙公主

御覽卷一百五十四引語林曰何晏以主爵駙馬都尉美姿儀帝每疑其傳粉後夏月賜以湯餅大汗出以朱衣自拭之尤皓然嬾真子云駙馬之名起於三國故何晏尙魏公主謂之駙馬都尉然不獨官名以駙馬給之蓋御馬之副謂之駙馬從而給之示親愛也一清案此言非也宋百官志云晉武帝以宗室外戚爲奉車駙馬騎都尉而奉朝請後省奉車騎都尉唯置駙馬都尉奉朝請永初已來以奉朝請選雜其尙主者唯拜駙馬都尉然則尙主拜駙馬都尉是東晉之制三都尉省二而駙馬之名特顯耳

好老莊言作道德論及諸文賦著述凡數十篇

隋經籍志何晏撰魏晉論議十三卷老子道德論二卷集十
一卷梁十卷錄一卷

注魏略曰太祖爲司空時納晏母并收養晏其時秦宜祿見阿
蘇

世說注引魏略作阿鯨

注及明帝立頗爲冗官至正始

正始下一本有初字是也

注又其母在內晏性自喜動靜粉白不去手行步顧影

宋書五行志魏尚書何晏好服婦人之服傅玄曰此服妖也

注俄而晏死有一男年五六歲宣王遣人錄之晏母歸藏其子
王宮中向使者搏頰乞白活之使者具以白宣王宣王亦問晏

疑有先見之言心常慕之且爲沛王故特原不殺

何云據此則平叔尙有後但亦出魏末傳恐虛妄耳費文禕
甲乙論晏子魏之親甥亦與同數雖曰敵國傳聞然以彼爲
可信

注初宣王使晏與治爽等獄晏窮治黨與冀以獲宥宣王曰凡
有八族晏疏丁鄧等七姓宣王曰未也晏窮急乃曰豈謂晏乎
宣王曰是也乃收晏

御覽卷六百五引魏末傳宣王欲誅曹爽呼何晏作奏曰宜
上君名晏失筆於地竄宇記卷百二十六何晏墳在廬江縣
北十七里其墓高大景雲二年有人發墳得塋銘是何公之
墓

注臣松之案魏末傳云曼取其同母妹爲妻此縉紳所不忍言
雖楚王之妻嫂

何云嫂當作嬖

注皇甫謐列女傳

隋經籍志列女傳六卷皇甫謐撰

并錄前功封平陵亭侯

前漢書地理志右扶風平陵

尙夜多持油船將步騎萬餘人於下流潛渡攻瑾諸軍夾江燒
其舟船水陸並攻破之

寰宇記卷一百四十六三國志魏將夏侯淵南郡作浮橋
度景里洲今在郡西一清案事亦見董昭傳但言入渚中安

屯作浮橋南北往來而不云景里洲荊州志自籍洲次東大洲有三首曰枚迴中名景里下名蒼尾水經江水注作郢里洲蓋唐人避諱改之

尙有愛妾嬖幸寵奪適室適室曹氏女也

晉書景懷夏侯皇后傳父尙魏征南大將軍母曹氏魏德陽鄉主明帝世宣帝居上將之重諸子並有雄才大略后知帝非魏之純臣而后既魏氏之甥帝深忌之青龍二年遂以鳩崩無男生五女

玄字太初

世說注引魏氏春秋曰玄大將軍前妻兄也風格高朗宏辯博暢又世說曰夏侯太初常倚柱作書時大雨霹靂破所倚

柱衣服焦然神色無變書亦如故賓客左右皆跌蕩不得住
注引語林曰太初從魏帝拜陵陪列於松柏下時暴雨霹靂
正中所立之樹冠冕焦壞左右觀之皆伏太初顏色不改臧
榮緒又以爲諸葛誕也又世說曰裴令公目太初肅肅如入
廊廟中不修敬而人自敬一曰如入宗廟琅琅但見禮樂器
時人目太初朗朗如日月之入懷

嘗進見與皇后弟毛曾並坐玄恥之不悅形之於色

世說云魏明帝使后弟毛曾與夏侯玄共坐時人謂之蒹葭
倚玉樹

左遷爲羽林

宋百官志羽林監漢武帝太初元年初置建章營騎後更名

羽林騎置令丞東京又置左右監至魏不改

夫欲清教審選在明其分敘不使相涉而已

何云清教謂中正審選謂臺閣

官長則各以其屬能否獻之臺閣臺閣則據官長能否之第參以鄉閭德行之次擬其倫比勿使偏頗

何云前代吏部用人略得此意雖不設中正猶參取鄉評也
下放殿周五等之敘徒有小大貴賤之差亦無君官臣民而有
二統互相牽制者也

何云此議古今可以通行但吳蜀未一各置重鎮郡守之權
不得不有所統又其人素貴驟與令長等列雖爵命不齊必
以失權爲恨猶當徐俟混一乃議之也

命科制自公列侯以下位從大將軍以上皆得服綾錦羅綺純素金銀飾鏤之物

宋禮志謁者高山冠本齊服也一名側注冠秦滅齊以其君冠賜謁者魏明帝以其形似通天遠遊乃毀變之晉輿服志魏明帝以公卿袞衣黼黻之飾疑於至尊多所減損始制天子服刺繡文公卿服織成文

今公侯命世作宰

公侯謂懿三公封侯故兼稱之

此伊周不正殷姬之典也竊未喻焉

何云於時懿方營立私門日暮倒行何暇經遠如清教審選各不相涉而仍互相形檢此反掌可行而亦不能有所改革

有以知其志不在公矣

頃之爲征西將軍假節都督雍涼州諸軍事

晉樂廣傳廣父方參征西將軍夏侯玄軍事廣時年八歲玄嘗見廣在路因呼與語還謂方曰向見廣神姿朗徹當爲名士卿家雖貧可令專學必能興卿門戶也

玄與曹爽共興駱谷之役時人譏之

何云眞嘗建議伐蜀而無功淵被殺於陽平二子所以共興是役也然不料劉葛之澤尙存賢才未盡君臣無覺守備甚設豈可倖其有功哉年少浮華未練於事無端輕舉遂爲國家之憂悲夫

注以東莞太守召爲后家

方輿紀要卷三十五漢東莞縣屬瑯琊郡三國魏置東莞郡
今山東沂水縣也

注緝遣子邈與豐相結

張邈張既傳注引魏略作藐

注豐前後仕歷三朝

三字一本作二

注孫盛雜語曰玄在囹圄會因欲狎而友玄玄正色曰鍾君何
相偏如此也

世說夏侯玄既被桎梏時鍾毓爲廷尉鍾會先不與玄相知
因便狎之玄曰雖復刑餘之人未敢聞命注引名士傳云初
玄以鍾毓志趣不同不與之交玄被收時毓爲廷尉執玄手

曰太初何至於此玄正色曰雖復刑餘之人不可得交案郭
頒西晉人時世相近爲晉魏世語事多詳覈孫盛之徒皆采
以著書並云玄拒鍾會而袁宏名士傳最後出不依前史以
爲鍾毓可謂繆矣又世說太初與廣陵陳本善本與玄在本
母前宴飲本弟騫行還徑入至堂戶太初因起曰可得同不
可得而雜

注於是豐玄緇敦賢等皆夷三族

御覽卷八百八十四引異苑曰夏侯玄爲司馬景王所誅宗
人爲之設祭見玄來靈坐上脫頭於膝取食物酒馘之屬以
內頭中畢還自安頭而言曰吾得請於帝矣子元無嗣也及
永嘉之亂有覲見宣王涕泗云國家傾覆是曹爽夏侯玄訴

冤得伸故也

注玄嘗著樂毅張良及本無肉刑論辭旨通遠咸傳於世

隋經籍志夏侯玄集三卷

注玄之執也魏將軍司馬文王流涕請之

何云魏將軍或疑作衛將軍然以三少帝紀證之文王於時爲安東將軍亦非衛將軍也

注先是司空趙儼薨大將軍兄弟曾葬賓客以百數玄時後至眾賓客咸越席而迎大將軍由是惡之

姜云太初之死由師風憾兼有異志惡其相逼而構此獄觀世語諸書可證其妄嗚呼華督行弑而孔父先亡曹氏篡奪而文舉遂滅賢人之於國關係豈不重哉

注與陳國袁侃對

侃是袁渙子

注故減死徙邊

何云故字疑當作改

注日限在前

御覽卷二百十六日限上有某守雖後四字

注帝前取事視之乃釋遣出望其衣敗曰清吏也賜之

世說允爲吏部郎多用其鄉里魏明帝遣虎賁收之其婦出

誠允曰明主可以理奪難以情求旣至帝殿問之允對曰舉

爾所知臣之鄉人臣所知也陛下檢校爲稱職與不若不稱

職臣受其罪旣檢校皆官得其人於是乃釋允衣服敗壞詔

三
賜新衣初允被收舉家號哭阮新婦自若云勿憂尋還作粟
粥待頃之允至

注允善相印將拜以印不善使更刻之如此者三

姜云晉以前一官之任卽鑄一印故朱買臣在京邸而卽懷
其會稽太守章也一清案宋書孔琳之傳琳之建議曰夫璽
印者所以辨章官爵立契信官莫大於皇帝爵莫尊於公侯
而傳國之璽歷代迭用襲封之印奕世相傳貴在仍舊無取
改作今世唯尉一職獨用一印至於內外羣官每遷悉改討
尋其義私所未達若謂官各異姓與傳襲不同則未若異代
之爲殊也若論其名器雖有公卿之貴未若帝王之重若以
或有誅夷之臣忌其凶穢則漢用秦璽延祚四百未聞以子

嬰身戮國亡而棄之不佩帝王公侯之尊不疑於傳璽人臣
眾僚之卑何嫌於卽印載籍未聞其說推例自乖其準而終
年刻鑄喪功消寶金銀銅炭之費不可稱言非所以因循舊
貫易簡之道愚謂眾官卽用一印無煩改作若有新置官又
官多印少文或零失然後乃鑄則仰神天府非惟小益

注十可申八九

申是中之譌

注是故有一十二家相法傳於世

隋經籍志梁有手板經受板圖韋氏相板印法指略鈔魏征
東將軍程申伯相印法各一卷又有伯樂相馬經甯戚王良
高堂隆相牛經淮南八公相鵠經浮邱公相鶴書相鴨經相

雞經相舊經相貝經

注允妻阮氏

世說許允婦是阮衛尉女德如妹注引晉諸公贊曰允有正情與文帝不平遂幽殺之婦人集載阮氏與允書陳允禍患所起辭甚酸愴又引陳畱志曰阮共字伯彥尉氏人清真守道動以禮讓仕魏至衛尉卿少子侃字德如有俊才而飭以名理風儀雅潤與嵇康爲友仕至河內太守

注世語曰允二子奇字子泰

世說注引晉諸公贊曰奇泰始中爲太常丞世祖嘗祠廟奇應行事朝廷以奇受害之門不令接近出爲長史世祖下詔遽允宿望又稱奇才擢爲尙書祠部郎

注世語曰經字彥偉

偉管輅傳注作緯

注碑河內向雄爲都官從事

晉書向雄傳雄字茂伯河內山陽人父韶彭城太守

注王業之出不申經竟以及難

三少帝紀及世說注竟作意是也

注漢晉春秋曰經被收辭母母顏色不變笑而應曰

世說經被收涕泣辭母曰不從母敕以至今日母都無憾容
語之曰爲子則孝爲臣則忠有孝有忠何負吾耶

注晉武帝太始元年詔曰故尙書王經雖身陷法辟然守志可
嘉門戶煙沒意常啓之其賜經孫郎中

何云案此詔可見因沈業申意之言亦誣一清案世說注已
辨世語爲非

荀綽冀州記曰贊子洪字良伯

晉書崔洪傳洪博陵安平人高祖寔著名漢代父讚魏吏尙
書左僕射以雅量見稱

宿松羅忠濟初校

黟縣黃士陵覆校

陽湖吳翊寅再覆校

三國志注補卷九